



太平天国 史料汇编

太平天国历史博物馆

编

16



凤凰出版社

太平天国 史料汇编


太平天国历史博物馆

编

16

各地

江苏



凤凰出版社

各地·江苏地区·第四部分·苏南地区

卷一 方志记载

记兵

光绪《苏州府志》

咸丰三年春，粤贼陷江宁，提督向荣及部将张国梁讨之，久不下。

六年，荣卒，提督和春代之，骄愎失士心。

十年春三月，贼陷杭州，旋由东坝回军。丁亥，陷溧阳，知县尚那布、都司徐龙彪、千总熊德等死之。

闰月己酉，大营溃，和春走缙甯墅关。国梁在镇江，闻变南驰，甲子至丹阳，过桥马逸，溺于水。是日，贼陷丹阳，知县方浚泰死之。

夏四月庚午，陷常州，总督以下前遁，通判岳昌、守备袁敏死之。甲戌，陷无锡。丁丑，薄苏城。长洲县知县李翰文、元和县知县冯树勋部下广勇开门迎贼，伪忠王李秀成遂入踞城，巡抚徐有壬、代理按察使朱钧、苏州府教授张镜纯死之。是日，贼分陷宜兴、江阴。越八日，乙酉，江阴贼退。戊子，陷吴江。庚寅，陷昆山。壬辰，陷太仓。

五月戊戌，陷嘉定。是日，江阴贼复入。辛丑，太仓贼退，官兵入守。乙巳，陷青浦。丙午，陷松江、娄县，知县卞乃譚死之。

当苏州之亟也，布政使薛焕以夷务奉旨赴沪，免于难，遂擢巡抚，上海道吴煦兼署藩司，以上海为行省。及是青浦、松江连陷，始戒严。煦识美利坚废将华尔才，令率西勇助守，是为用夷兵之始。庚申，复松江，移攻青浦。华尔率西勇登城，我勇不进，华尔伤乃归，勇亦遣去。厥后松江再陷再复，仍令华尔入守，以夷法部勒我勇，衣履、器械、步伐皆夷也。辰山之捷，上赐名“常胜军”，始五百人，递增至四五百人。

六月，秀成大举东犯。戊子，复陷松江。秋七月，癸巳朔退。甲午，犯上海。时城勇仅千人，煦借夷兵千人偕守。始用开花炮，发必中，中必贼酋

营，贼以为神，戊戌宵遁。戊申，贼陷金坛，知县李淮、参将周天孚、艾德胜死之。

八月甲寅，贼犯太仓镇洋县，知县吴梁遇伏死。乙亥，城复陷，都司邓应樾死之。是日，常熟亦陷。

上海自贼退，避难者四集，商市厘捐日旺。逾年，募勇至四五万，闻贼辄走，恣行劫掠，民苦之。时钦差总督曾国藩军已克安庆，诸将遵江东略，兵力甚厚。苏绅顾文彬自楚归，知其状，始创乞援之议。煦愿任饷事，遂属太仓钱鼎铭往，国藩许之。

十有一年十一月壬子，杭州陷。伪慕王谭绍洸合江、浙贼十余万犯松江，常胜军击走之。遂犯浦东，远近守兵四五万尽溃，上海大震。西人通意苏绅潘增玮，愿助顺。焕与团练大臣庞钟璐欲勿许，顾势日亟，乃听之。

议甫成，十有二月庚午，贼陷奉贤，其明日，陷南汇，又明日，陷川沙、金山卫城，进逼上海。投书西人，令毋助我，词甚倨。西人怒拒之，严陈以待，贼闻解去。

同治元年春正月，复犯松江，踞广德林，众数万。华尔率五百人出击，大胜之，进平辰山、天马山贼垒。复会英、法兵各五百人克浦东之高桥、萧塘镇。

二月壬申，贼陷金山县。是月，煦雇轮船十，赴安庆迎师。国藩疏荐前福建延建邵道李鸿章能办贼，令总统程学启等军，率勇六千东下。复令总兵黄翼升、李朝斌水师助之，期后至。三月庚寅，鸿章等行，越翼日至沪。

当是时江以南、浙以西余五城，湖州势最孤；冯子材率国梁旧部守镇江；常胜军守松江，亦屡濒于危；上海、宝山，倚西援延喘息，民望皖军，如望岁焉。

丙申，金山县贼退。

夏四月乙卯，华尔及英人何伯、法人卜罗德克嘉定，丙寅，克青浦。丁卯，鸿章署巡抚，西人请会剿浦东。鸿章令潘鼎新等出周浦，当北路，是为浦东军；华尔及西人当南路，由金山县攻南桥。辛未克之，卜罗德阵没，贼走柘林。壬申，追败之，癸未，复柘林。乙亥，复奉贤。鼎新等败贼于杭头、于新场。

时焕将去，知府李庆琛以立功说之。焕畀勇五千攻太仓，军城东板桥，贼不出。是月辛未，秀成率伪听王陈炳文、伪纳王郜云官救之，众数万，庆琛军溃死。参将姜德退保宝山，贼尾至，击却之，遂分窜，嘉、青皆告亟。华

尔及西兵方议直捣金山，闻败，华尔归守青浦。戊寅，西兵至嘉定之南翔，见贼众，留二日。庚辰，突围入城，挟中、西守兵出走，嘉定复陷。

华尔既去，鼎新分兵守南桥。己卯，攻南汇，贼目吴建瀛请降，许之。是夕，鼎新使刘铭传驰还周浦，备中变。

五月壬申朔，鼎新入城受降。秀成次日自金山卫至，败之，纠川沙贼又至，又败之，遂尾之，丙戌，复川沙。

嘉定之再陷也，贼分趋松江、上海。广富林者，入松江之要隘也，泗泾者，入上海之要隘也，焕皆拨兵二千守之。五月朔，贼犯泗泾，守兵溃。次日，广富林兵退保松江，贼从之。华尔闻，自青浦驰入松城固守。泗泾贼斜趋虹桥，距大营十二里，鸿章先檄诸军会援。丁亥，学启败贼于虹桥。戊子，七堡贼至，又败之，进平七堡，而松围益急。华尔尽舁洋枪、洋炮列城上轰击，两昼夜不绝声，贼不动。常胜军之分剿宁波者寻至，大败之豆腐浜，始气沮宵遁。甲午，西人偕华尔弃青浦，如嘉定事。

松围既解，贼复屯泗泾及广富林一带，联络三四十里。壬寅，贼分十二支四面驰突，围学启新桥营数十匝。鸿章闻之，亲勒兵驰救。张树声、张遇春、郭松林等从鸿章兵离皖数月，摩厉久，不得一当贼，至是勇气十倍。学启望见鸿章旗，亦突围出，内外夹击，贼大败，奔还泗泾。甲辰，乘胜攻泗泾，贼走。

是月己丑，贼陷湖州，羁守绅赵景贤，久之终不屈，被害。

初，鸿章之至也，廷议谓宜取建瓴之势，自镇江进兵，屡促赴镇。鸿章心知不可，而嫌于怀安，计未决。至是进取之机在握，贼亦全力瞰上海，势无可离，始以实闻，诏从之，赴镇之议乃寝。

初，柘林、奉贤既复，无守兵，贼复入。是月壬辰，鼎新等克奉贤，守之。柘林贼走，令降人刘玉林守之，贼退保金山卫城。遂约华尔会剿，自出柘林攻漕泾，当东路；华尔出张堰，当西路。六月壬申，克卫城，自是浦东无贼踪。

秋七月丙申望，学启、华尔再复青浦。庚子，绍洸率贼十万薄城，总兵黄翼升水军自梁山新至，击走之。贼移犯北新泾，蔓延法华一带，距大营数里。降人刘玉林战没，贼围况文榜等营，相持十日。鸿章牒翼升、学启、华尔各军之半趋泗泾、七堡，出贼之后，以达于北新泾，而亲勒兵会之。学启等败贼于七堡，同知韩正国死之。八月癸丑，鸿章会诸军大破贼，毁其营数十。贼渡吴淞北去，北岸旧有贼营七，复踞之。无何，翼升、华尔至，毁七

营,贼回犯北新泾,铭传等击却之。丙子,翼升克淀山湖西岸石垒,自松入苏水、陆要隘也。是日,华尔克浙之慈溪,伤于胸,越两日卒。

闰月丙戌,翼升克吴江之芦墟。

九月庚戌朔,常胜军会西兵再复嘉定。绍洸复大举东犯,分两路,北窥南翔,南窥黄渡。南路贼尤众,自四江口迤邐及青浦,连营百余。癸亥,围刘士奇、郑国魁等营,皆告亟。鸿章率学启及弟鹤章等救之。丙寅,败贼于四江口南岸,戊辰,又败之北岸。辛未,诸军集,遂分三路进。学启居右,松林居左,铭传居中,自以亲兵继之。三将同时督洋枪队逼贼营,拔签逾濠。贼炮弹雨注,皆膝行而前,冒烟焰直入,斩黄衣酋数人,贼阵稍动。诸军大呼继进,无不一当十,贼大溃。擒、斩数千人,人、马落水死者无算,水为不流,余贼窜昆山,为鸿章东征以来第一大捷,自是松、沪无贼踪。

冬十有二月戊寅朔,常熟贼骆国忠、董正勤等杀其酋以城降,又以攻克福山、许浦自效,正勤寻战没。癸未,秀成攻常熟,国忠固守,复陷福山。时学启、鹤章方剿太仓,益之以奥伦常胜军二千人,令亟攻以分贼势。

初,华尔临卒,荐白齐文自代。会国藩檄常胜军攻九洑洲,鸿章令煦率以往,白齐文求饷无厌,留不行,殴伤前粮道杨坊,且叛。鸿章罢之,则窃我小轮船馈贼以降。久之,不为贼信,入粤溺于海。奥伦者,西人荐以代白齐文者也。甲午,薄城。凡西人攻城,辄先一日戒期,旦则发大炮坏其城,络绎以开花炮继之,使贼不得上缺口。因以其隙,架浮桥,死士鼓锐以济,于烟焰中登陴,入必与戒期合。是役也,奥伦怯,临济趑趄,贼蜂拥出,乃退。既而自惭辞去,西人又荐戈登代之。

二年春正月丁卯,焕内诏,鸿章先已授巡抚,至是兼署通商大臣。福山之陷也,鸿章牒翼升水师三营浮海前剿。又拨常胜军五百人,以鼎新、刘秉璋领之,乘轮船偕发。复大风雨,海潮若山,师船小,不可耐海飙,多覆溺。轮船大,不能及岸,久之,始入港,相持又两月余。二月甲戌,常胜军始轰塌港东石垒,诸军继进,并击港西贼,殄之,常熟围解。是月甲申,守金山副将覃联陞克平湖新仓镇,死之。

三月,学启、鹤章复攻太仓。乙卯,伪会王蔡元隆诈降,郊迎,请入城,不许。无何,伏发,鹤章伤于足,学启殿军而退。

初,鸿章檄戈登攻昆山,及是令折而东,会攻太仓。诸将愤前之受诒,攻之亟。辛酉,破西门,元隆弃城走嘉兴,厥后降于浙军云。癸亥,学启乘胜攻昆山。丁卯,鸿章巡视诸营,寻还沪。

夏四月癸未，绍洸等四伪王陷双凤，犯太仓，鹤章与鏖战三昼夜，贼大败，退入昆山。学启破城外贼营二十有四，杀贼万余，绍洸不敢出。昆、苏之间曰进义镇，有贼营四，学启、戈登策昆山贼败，必奔进义为后患。己丑，越昆山袭破之，而令诸军急攻城。是夕，贼倾城走，追之，与进义兵东西夹击，贼殪焉。庚寅，复昆山。戈登与鸿章书云“学启自足办贼，不假人助”，盖是役自始终未用西人大炮云。

于是集议攻苏州。时苏州附郭，惟南之吴江，西之无锡，西北之江阴未下。或谓复无锡、江阴，则苏州不战自举；或谓置二县为贼去路；或谓复江阴，置无锡；或谓吴江与嘉、湖贼通消息，宜先复。鸿章以后二议为善。学启进军苏城东北之蚬子山，为前驱，是为苏州军。

是月甲申，翼升、铭传水、陆攻杨舍城，江阴、常熟之间江海之交要隘也，毁贼营三十余，遂偕鹤章、松林攻江阴，是为关外军。江阴贼合伪侍王李世贤、伪护王陈坤书、伪潮王黄子隆、伪章王、普王众十万，旌旗绵亘数十里，经杨舍达于顾山，声言趋常熟。苏贼亦至，势颇炽。

五月丁卯，我兵与贼鏖战两昼夜，贼大败，毁其营百余，伪勋王、广王闭门誓死守。

六月丁亥，学启克花泾港。戊子，士奇克同里，洞庭东山贼闻风遁。己丑，诸军抵吴江，贼开门降，学启入守。辛卯，嘉兴贼至。丙申，苏州贼至，皆击却之。

秋七月，总兵李朝斌既克九洑洲，率太湖水师至沪，鸿章与偕巡水、陆诸军。乙卯，发上海，自朱泾抵风泾，入浙之西塘，折而北，遵太湖径吴江达苏州。风泾者，娄县西界；西塘者，嘉善东界，两镇毗连，皆要隘也，守贼各数万。时浦东军秉璋、鼎新、杨鼎勋、西人马格里等方剿风泾。丁巳，鸿章至，是日一鼓克之。毁石垒三，土营一，贼卡七，擒、斩三千余人。进攻西塘，获伪王宗廖某等四酋，自西塘至千窑，贼连营二十里皆平。壬申，云官犯荡口营，滕嗣武击败之。鸿章在苏郊，率王东华等驰救。贼走，追之，破黄埭贼营，复追至城下而还。

甲戌晦，江阴合围。是夕，有降人导我兵登城，八月乙亥朔，复江阴。是役也，总兵赖荣光死之。

鸿章往劳师，令关外军相机前剿后援，又令诸军进逼苏城。以兵少不能合围，议水、陆各军散布城四面，首尾联接，但削平城外十垒，即城可下。十垒者，五龙桥、宝带桥、蠡口、黄埭、王瓜泾、浒关、观音庙、十里亭、虎丘，

与沿濠土城而十。

部署既定，鸿章还沪。学启进次跨塘，逼娄门，诸将亦分四面驻军。八月戊寅，学启克宝带桥。癸巳，叛鬼白齐文坐轮船率贼数万，水、陆并出。朝斌、戈登迎战，学启又自黄天荡截击之，贼始退。壬辰，贼复出，秀成由齐门，绍洸由葑门，我兵分拒之。遂合而西北，犯关外大桥角黄中元营，鹤章救之。贼以轮船为先锋，炮船当其冲者，沈之、夺之。常熟降人钱桂仁更名周寿昌者，见事亟，率数十人夺贼船一。杀其人，衣其衣，驶近轮船，以火箭射之，船迸裂，声震天地，焚大小贼船八。鹤章乘势进击，贼大败，退保黄埭。癸卯，嘉兴贼元隆及伪荣王廖发受犯七里桥营，何安泰、戈登击走之。

九月丙辰，学启等克五龙桥。嘉、湖贼屡犯同里，学启谓：非大创之，将为苏军南顾之忧。属戈登守五龙桥，自率克根本、马格里大举南剿。己未，抵八圻，贼迎战大败，擒伪贵王陈得胜。追至平望，尽毁所过贼营，乃旋师。

癸亥，学启等克蠡口。冬十月甲戌朔，克黄埭。壬午，翼升、学启、戈登合水、陆军自黄埭绕入浒关，败伪来王陆顺得兵，毁贼营数十，克浒关，乃分道。戈登克王瓜泾，学启克观音庙，学启又偕克根本克十里亭，虎丘贼溃。于是城外十垒，惟沿濠土城存。土城者，苏城外多水，贼依水为小城，下作窟室以避炮，遍于六门，而娄门外尤高坚，贼精锐聚焉。

甲申，鸿章至军，责战益亟。己丑夜，诸军月雾中潜支浮桥，垂成而贼觉。戈登发炸炮，学启等千枪齐举，杀贼甚多，而守陴贼不动，乃退。辛卯，秀成潜入城。壬辰，鸿章亲督程、戈两军分南、北岸进攻娄门，戈登以准望法发开花炮，土城石垒皆飞动，贼退伏窟室中，我兵支浮桥以济。忠、慕二贼拥众万余出，鏖战数十合，且战且退，遂毁沿濠土城，于是城外十垒尽矣。群贼胆裂，不复出。总兵尹连陞死之。

秀成知不可支，癸巳，率贼万余北去，与绍洸恸哭而别。云官及伪比王伍贵文、伪康王汪安钧、伪宁王周文佳、伪天将范启发、张大洲、汪怀武、汪有为等八人，介郑国魁乞降，愿缚绍洸为贄，鸿章许之。戈登请学启贯绍洸死，学启阳诺之，而密谕国魁欲得死绍洸，不欲得生绍洸。丁酉，绍洸登陴，有为突刺之，遂入伪慕府纵火，杀其党千人，夜开齐门降。戊戌，献绍洸首于军。己亥，鸿章入城，寻还营。令八人入见，数以要挟之罪而斩之，学启之谋也。学启匹马入娄门，戒群贼毋动，八人外不问，二十余万众咸誓伏。壬寅，全军入城。

初，常胜军克一城，必入城大掠，鸿章先与戈登约，毋入苏城，戈登颇

患。至是责鸿章杀降，招云官子胜鏖与同起居，为募广勇千人，且助之反。苏绅潘曾玮夙与戈登习，鸿章令百端晓譬之，乃以胜鏖付曾玮，反谋始寢。

关外军自入无锡境，十旬数十战，大胜者十有五，毁贼营百余。冬十月己亥，秀成自苏州率贼万余及轮船、洋鬼攻万寿桥营，我军小却。诸军进援，贼败，秀成北窜。是日，鹤章克新安，连克望亭。翼升、松林、周盛波各军出关会之，于是苏州军与关外军始合。

十有一月甲辰朔，鹤章克惠山石卡、树声克亭子桥。乙巳，贼溃走，追之，获伪潮王及其子德楸，遂复无锡，进师常州。辛亥，树声、盛波克白家桥。壬子，奔牛贼邵志纶降于铭传军。丁巳，破常州东北贼营十余，收降卒万六千人，是日克孟河。戊午，败坤书兵于城下。癸亥，句容贼伪章王合伪然王、治王来援，败之，追至西门外七里桥。伪章王等窜孟河，毁降人张邦佐营，邦佐阵没。贼围奔牛降人营，铭传驰救，十有二月辛巳，大败之。丙戌，鹤章继至，毁贼营三十余，焚轮船一，奔牛围解。

浦东军既克西塘，进攻嘉善之张泾汇。冬十月癸巳，战不利，参将王玉林死之，秉璋伤于足。甲午，贼大至，秉璋裹创出击，却之。十有一月，丁未，克张泾汇。辛亥，平湖贼陈殿选降于鼎新军，引我兵入城，杀其不降者。乙卯，乍浦降。丙辰，海盐及瞰浦降。戊午，珣城贼犯鼎新营，击追之，遂克珣城。

是月乙丑，学启、朝斌攻平望。丙寅，嘉兴贼来救，王永胜、龚生阳败之。毁平望石垒三，获船五百余，斩馘甚众。丁卯，学启克九里桥、黎里，进师嘉善，于是苏州军与浦东军始合。辛未，嘉善贼陈占榜、余嘉鳌降，学启、秉璋入城，贼环跪郊迎，市肆无改，为他城所未有。

先四日丁卯，鼎新亦克沈荡，己巳，克新丰，学启进攻嘉兴。三年春正月，秉璋、鼎新先后至。丙寅，毁北城外石垒七，斩馘千，我军伤亡亦半之。守备姜宝胜不进，斩之以徇。又克秋泾桥、吴清桥，丁卯，克盐仓桥。庚午，学启督诸军进攻，肉搏登城，喷筒雨下，乃退，总兵何安泰死之。会湖州贼伪堵王黄文金犯盛泽，令永胜往击走之。二月丁亥，复猛攻，炮声三昼夜不断，于烟焰中筑月墙、浮桥，炮台发大炮，裂城十数丈。己丑黎明，学启跃而上，中枪仆。部下士奇、永胜等愤怒，皆以筏渡，簇拥登城，贼大乱。秉璋等亦拔樁过濠，入东门，斩伪艇王刘得功。发受犹巷战，其下死殆尽，乃匿井中，钩出之，梟其首，城遂复。学启伤重还苏州，三月甲戌卒。

戈登之从复苏州也，朝廷锡予甚厚，以故谒鸿章愿释前憾，助剿宜兴，

许之，檄松林、鼎新等会之。正月辛酉，抵城下，毁附城贼营，松林伤于肘，嗣武伤于足。甲子，败贼于上江桥，又败援贼伪代王黄靖忠，获贼船千。丙寅，坏其城，贼西走。

进师溧阳。己巳，败贼于张渚，沙巷贼迎降。庚午，平张渚贼营，擒贼千。世贤退入城，城贼吴人杰、梁柏和不纳，乃窜湖州。二月癸酉，人杰等迎降。

甲戌，移剿金坛，伪列王江某、伪襄王刘官方迎战，败之，斩伪列王。追至城下，都司张荣魁死之。会无锡诸城告亟，鸿章檄松林等东援，而以吴毓芬代之。

先是，提督鲍超由东坝南剿，前年冬，复高淳、溧水，三月，丁未复句容，辛酉，复金坛。毓芬至，适贼走，追及之南渡，戊辰，斩伪直王林得美于阵。

初，诸伪王救常州，屡犯铭传营，不动。二月壬申朔，大战，杀贼以千计，副将刘起、守备彭昌谕等死之，伤亡五百余人。属霖雨连旬，贼数万剃发裹械，冒雨潜行，东趋南闸、沙山、周庄、华墅、杨舍、常熟、福山，远近散布，无知者。壬午，同日易巾竖旗，攻卡围城，无锡、江阴、常熟皆大惊。鸿章闻，飞檄金坛军舍之去，常州军坚壁勿战，余军分兵会援，三日皆至。癸未，树声解江阴围。甲申，鹤章解无锡围。常熟将符信、魏承樾坚守。戊子，翼升至，大败贼，围解。杨舍、沙山，屯聚自若。乙未，戈登令勇八百突围入，燬焉。是月甲午，浙抚左宗棠复杭州，南境无事，乃令士奇、永胜北发。

三月壬寅，鸿章至军。丙午，翼升、士奇会攻沙山，贼败，缘山走，追奔三十里，平贼垒百余，杨舍贼亦出窜。日暮，鸿章自督国魁军，又檄诸军分四面邀贼。丁未，贼西窜，鸿章弟昭庆截击之。贼败，分为二，一南走，一西走，先后遇官兵于三河口，擒、斩、淹溺者十之九，余贼归常州。

己酉，鸿章冒雨至常州。辛亥，督诸军猛攻五昼夜，毁城下贼营。丙辰，坏其南城，伪志王力御，不得入。四月癸酉，循濠筑墙二百步，墙下凿一沟，夜匿兵支浮桥，三夕成。丙子，轰城，戈登毁其南，士奇毁其东，皆十数丈。翼升督水师入濠，诸军从之。坤书率广匪千余出小南门拒战，永胜迎击，树声乘间登南城。坤书退，见城破，入城巷战十余合，总兵张行科、龚生阳共擒之。尽杀广匪，而贯降贼七万人，行科死之。实四月六日未时，距庚申四月六日未时城陷，恰四期云。鸿章寻还苏。

戊寅，丹阳贼杀其酋陈时永而遁，时永，伪英王玉成之叔也。于是江以

南、嘉兴以北无贼。

初，西南诸军以常州未复，按兵浙之湖州、皖之广德界上。至是鼎新等追剿长兴，军南浔。五月丁未，败援贼伪乐王谭应芝、伪襄王刘官方登等于殷渎村。戊申，朝斌水师由太湖入长兴之夹浦口，毁滨湖贼垒。松林亦至，癸丑合围。丙辰，败湖州、广德、四安援贼伪辅王杨辅清、伪堵王等于城下。朝斌水师登陆，绕出贼后，自山脊疾驰而下，沿山贼垒皆溃，急攻城。癸亥，复长兴。

六月庚申朔，鸿章至军，檄铭传、永胜、士奇、盛波率兵万四千助剿金陵，甲申至。乙酉，曾国荃克金陵，秀成就擒矣。

又牒诸将攻湖州，议先取两要隘：前曰晟舍，以属朝斌、秉璋、鼎新等；后曰尹隆桥、大德桥，为广德、四安之大道，以属松林、永胜等。丙申，朝斌至晟舍，锦山、织里贼来救，败之。秋七月己酉，鼎新造浮桥成。辛亥，合水、陆师及浙兵会剿者，五路并进，大败贼，贼走，晟舍平，总兵江福山死之。

松林等至尹隆桥，六月壬辰，败贼于吕山，距桥五里，遂与贼隔水而军。丁酉，大战，贼败，提督陈忠德穷追，死之。秋七月癸丑，文金率贼数千出吕山后，截我饷道，李长乐击却之。戊午，湖州贼倾巢出，长乐等迎击，王平西以炮船助战，永胜等伏兵山巅下击之，贼仓皇四遁。朝斌、秉璋等复先后入大钱口，水、陆会攻，癸亥，克大德桥。甲子，尹隆桥洲贼先遁，丙寅入城。是日，吴毓芬克四安。丁卯晨熹，梅溪援贼至，见我军大惊，弃械降。

铭传等自金陵旋师，出溧阳，攻广德。丁卯，贼弃城南走，将追之，谍告文金率贼三万且至，乃止。戊辰，文金至，亦南奔，铭传、盛波及弟盛传分三路追之。六月己巳朔，铭传及之孝丰，擒、斩无算。盛波出宁国，盛传出安吉，遇贼皆无多。余贼自此窜江右，而闽，而粤，不复振，逾年而灭。

平金陵之月，诏论功行赏。鸿章先已加太子少保衔，至是赏戴双眼花翎，封一等伯，寻赐号“肃毅”。翼升、朝斌以下，擢叙有差。

（选自光绪《苏州府志》卷二十八，页七十一至八十五，军制）

吴县咸同间兵事

民国《吴县志》

咸丰三【十】年夏四月丁丑，粤军薄苏州。长洲县知县李翰文、元和县知县冯树勋部下广勇开门迎之，忠王李秀成遂入踞城，巡抚徐有壬、代理按察使朱钧、苏州府教谕张镜纯死之。

当苏州之亟也，布政使薛焕以外交事奉旨赴沪，免于难，遂擢巡抚，上海道吴煦兼署藩司，以上海为行省。及是青浦、松江连破，始戒严。煦识美利坚废将华尔才，令率西勇助守，是为用西兵之始。庚申，取松江，移攻青浦。华尔率西勇登城，清兵不进，华尔伤，乃归，勇亦遣去。厥后松江再破，又取之，乃令华尔入守，以西法部勒清兵。辰山之捷，清帝赐名“常胜军”，始五百人，递增至四五千人。

六月，秀成大举来攻。戊子，复取松江，秋七月，癸巳朔退。甲午，攻上海。时城勇仅千人，煦借西兵千人偕守。始用开花炮，发必中，粤军以为神，戊戌宵遁。戊申，攻入金坛，知县李淮、参将周天孚、艾德胜死之。八月甲寅，攻太仓，镇洋县知县吴梁遇伏死。乙亥，城破，都司邓应樾死之。是日，常熟亦破。

上海自粤军退，避难者四集，商市厘捐日旺。逾年，募勇至四五万，临阵辄走，恣行劫掠，民苦之。时两江总督曾国藩军已克安庆，诸将遵江东略，兵力甚厚。苏绅顾文彬自楚归，知其状，始创乞援之议。煦、顾任饷事，遂属太仓钱鼎铭往，国藩许之。

十有一年十有一月壬子，杭州破。慕王谭绍洸合兵十余万攻松江，常胜军击走之。遂攻浦东，远近守兵四五万尽溃，上海大震。西人通意苏绅潘曾玮，愿助战。焕与团练大臣庞钟璐欲勿许，顾势日亟，乃听之。议甫成，十有二月庚午，粤军入奉贤，其明日，入南汇，又明日，入川沙、金山卫城，进逼上海。投书西人，令毋助清，词甚倨。西人怒拒之，严阵以待，粤军闻之，解去。

同治元年春正月，复攻松江，踞广德林，众数万。华尔率五百人出击，

大胜之，进兵辰山、天马山。复会英、法兵各五百人，取浦东之高桥、萧塘镇。

二月壬申，粤军入金山县。是月，煦雇轮船十，赴安庆迎师。国藩疏荐前福建延建邵道李鸿章，令总统程学启等军，率勇六千东下。复令总兵黄翼升、李朝斌水师助之，期后至。三月庚寅，鸿章等行，越翼日至沪。

当是时江以南、浙以西余五城，湖州势最孤；冯子材率国梁旧部守镇江；常胜军守松江，亦屡濒于危；上海、宝山，倚西援延喘息，民望皖军，如望岁焉。丙申，金山县粤军退。

夏四月乙卯，华尔及英人何伯、法人卜罗德取嘉定，丙寅，取青浦。丁卯，鸿章署巡抚，西人请会攻浦东。鸿章令潘鼎新等出周浦，当北路，是为浦东军；华尔及西人当南路，由金山县攻南桥。辛未取之，卜罗德阵没，粤军走柘林。壬申，追败之，癸未，取柘林。乙亥，取奉贤。鼎新等败粤军于杭头、于新场。

时焕将去，知府李庆琛以立功说之。焕畀勇五千攻太仓，军城东板桥，粤军不出。是月辛未，秀成率听王陈炳文、纳王郅云官救之，众数万，庆琛军溃死。参将姜德退保【宝】山，粤军尾至，为所败，遂攻嘉、青。华尔闻之，归守青浦。

戊寅，西兵至嘉定之南翔，见粤军众，留二日。庚辰，突围入城。既而弃嘉定，挟中、西守兵出走。

华尔既去，鼎新分兵守南桥。己卯，攻南汇，粤军守将吴建瀛请降，许之。是夕，鼎新使刘铭传驰还周浦，备中变。

五月壬午朔，鼎新入城受降。秀成次子自金山卫至，败之，纠川沙粤军又至，又败之，遂尾之，丙戌，取川沙。

粤军之再得嘉定也，分兵趋松江、上海。广富林者，入松江之要隘也，泗泾者，入上海之要隘也，焕皆拨兵二千守之。五月朔，粤军攻泗泾，守兵溃。次日，广富林兵退保松江，粤军从之。华尔闻，自青浦驰入松城固守。泗泾粤军斜趋虹桥，距清营十二里，鸿章先檄诸军会援。丁亥，学启败粤军于虹桥，戊子，又败之，进平七堡，而松围益急。华尔尽舁洋枪、洋炮列城上轰击，两昼夜不绝声，粤军不动。常胜军之分攻宁波者寻至，大败之豆腐浜，始退。甲午，西人偕华尔弃青浦，如嘉定事。

松围既解，粤军复屯泗泾及广富林一带，联络三四十里。壬申，分十二支四面驰突，围学启新桥营数十匝。鸿章闻之，亲勒兵驰救。张树声、张遇

春、郭松林等从鸿章兵离皖数月，摩厉久，勇气十倍。学启望见鸿章旗，亦突围出，内外夹击，粤军大败，奔还泗泾。甲辰，乘胜攻泗泾，粤军走。

是月己丑，粤军入湖州，羁守绅赵景贤，久之终不屈，被杀。

初，鸿章之至也，廷议谓宜取建瓴之势，自镇江进兵，屡促赴镇。鸿章心知不可，而嫌于怀安，计未决。至是进取之机在握，粤军亦全力攻上海，势无可离，始以实闻，赴镇之议乃寝。

初，清兵取柘林、奉贤，不能守。粤军复入。是月壬辰，鼎新等取奉贤守之，柘林粤军走，令降人刘玉林守之，粤军退保金山卫城。遂约华尔会攻，自出柘林攻漕泾，当东路；华尔出张堰，当西路。六月，壬申，取卫城，自是浦东无粤军。

秋七月丙申望，学启、华尔再取青浦。庚子，绍洸【洸】率兵十万薄城，总兵黄翼升水军自梁山新至，击走之。移攻北新泾及法华一带，距清营数里。降人刘玉林战没，围况文榜等营，相持十日。鸿章牒翼升、学启、华尔各军之半趋泗泾、七堡，出其后，以达于北新泾，而亲勒兵会之。学启等败之于七堡，同知韩正国死之。八月癸丑，鸿章会诸军大破之，毁其营数十。

粤军渡吴淞北去，北岸旧有营盘七，复踞之。无何，翼升、华尔至，毁七营，粤军回攻北新泾，铭传等击却之。丙子，翼升取淀山湖西岸石垒，自松入苏水陆要隘也。是日，华尔取浙江之慈溪，伤于胸，越两日卒。

闰月丙戌，翼升取吴江之芦墟。

九月庚戌朔，常胜军会西兵再取嘉定。绍洸复大举，分两路，北窥南翔，南窥黄渡。南路兵尤众，自四江口迤邐及青浦，连营百余。癸亥，围刘士奇、郑国魁等营，皆告亟，鸿章率学启及弟鹤章等救之。丙寅，败之于四江口南岸，戊辰，又败之北岸。辛未，诸军集，遂分三路进。学启居右，松林居左，铭传居中，自以亲兵继之。三将同时督洋枪队逼粤军营，拔签逾濠。炮弹雨注，皆膝行冒烟焰直入。诸军大呼继进，无不一当十，粤军大溃，擒、斩数千人，人、马落水死者无算，水为不流，余众退至昆山，自是松、沪无粤军。

冬十有二月戊寅朔，常熟骆国忠、董正勤等杀其将以城降清，又以攻克福山、许浦自效，正勤寻战没。癸未，秀成攻常熟，国忠固守，复取福山。时学启、鹤章方攻太仓，益之以奥伦常胜军二千人。

初，华尔临卒，荐白齐文自代。会国藩檄常胜军攻九洑洲，鸿章令煦率以往，白齐文求饷无厌，留不行，殴伤前粮道杨坊，且叛。鸿章罢之，则窃我

小轮船馈粤军以降，久之，不为粤军信，入粤溺于海。奥伦者，西人荐以代白齐文者也。甲午，薄城。奥伦怯，临济趑趄，粤军蜂拥出，乃退。既而自惭辞去，西人又荐戈登代之。

二年春正月丁卯，焕内召，鸿章先已授巡抚，至是兼署通商大臣。牒翼升水师三营浮海攻福山，又拨常胜军五百人，以鼎新、刘秉璋领之，乘轮船偕发。值大风雨，海潮若山，师船小，不耐海飙，多覆溺。轮船大，不能及岸，久之始入港，相持又两月余。二月甲戌，常胜军始轰塌港东石垒，诸军继进，并击港西粤军殄之，常熟围解。是月甲申，守金山副将覃联陞取平湖新仓镇，死之。

三月，学启、鹤章复攻太仓。乙卯，会王蔡元隆诈降，郊迎请入城，不许。无何，伏发，鹤章伤于足，学启殿军而退。

初，鸿章檄戈登攻昆山，及是令折而东，会攻太仓。辛酉，破西门，元隆弃城走嘉兴，厥后降于浙军云。癸亥，学启乘胜攻昆山。丁卯，鸿章巡视诸营，寻还沪。

夏四月癸未，绍洸等四王取双凤，攻太仓，鹤章与鏖战三昼夜，粤军大败，退入昆城。学启破城外营二十有四，杀万余人，绍洸不敢出。己丑，学启、戈登先袭破进义镇，令诸军急攻城，庚寅破之。

于是集议攻苏州。或谓取无锡、江阴，则苏州不战自举；或谓置二县；或谓取江阴，置吴【无】锡；或谓吴江与嘉、湖粤军通消息，宜先取。鸿章以后二议为善。学启进军苏城东北之蚬子山，为前驱，是为苏州军。

是月，甲申，翼升、铭传水、陆攻杨舍城，江阴、常熟之间江海之交要隘也，毁其营三十余，遂偕鹤章、松林攻江阴，是为关外军。江阴粤军合侍王李世贤、护王陈坤书、潮王黄子隆、章王、普王众十万，旌旗绵亘数十里，经杨舍达于顾山，声言趋常熟。苏州粤军亦至，势颇炽。

五月丁卯，与清兵鏖战两昼夜，大败，勋王、广王闭门誓死守。

六月丁亥，学启取花泾港。戊子，士奇取同里。己丑，清军入吴江，学启守之。辛卯，嘉兴粤军至。丙申，苏州粤军至，皆击却之。

秋七月，总兵李朝斌既取九洑洲，率太湖水师至沪，鸿章与偕巡视水、陆诸军。乙卯，发上海，自朱泾抵风泾，入浙之西塘，折而北，遵太湖径吴江达苏州。时浦东军秉璋、鼎新、杨鼎勋、西人马格里等，方攻风泾。丁巳，鸿章至，是日一鼓取之。毁石垒三，土营一，军卡七，擒、斩三千余人。进攻西塘，获王宗廖某等四人，自西塘至千窑，粤军连营二十里皆破。壬申，云官